

2015-yil – Keksalarni e'zozlash yili

Oliyjanob maqsadlar bilan 2015-yilga qadam qo'yar ekanmiz, biz uchun milliy o'zligimiz timsoliga aylanib ketgan kattaga – hurmat, kichikka – izzat, mehr-oqibat, shafqat va muruvvat kabi ezgu fazilatlarini yanada mustahkamlab, ularni jondan aziz farzandlarimizning ong-u shuuriga singdirishda kirib kelayotgan yil muhim, yuksak bir bosqich bo'lishiga ishonaman.

Islom KARIMOV

Vatan yagonadir,
Vatan bittadir!

N:2 (67011)
2015-yil
12-yanvar

Tong yulduzi

www.tongyulduzi.uz

Gazeta 1929-yil 1-avgustdan chiqa boshlagan O'zbekiston Respublikasi bolalar va o'smirlar gazetasi ISSN – 2010-6092

14-YANVAR – VATAN HIMOIYACHILARI KUNI



Bayram arafasida poytaxtimizning Yunusobod tumanidagi 274-umumta'lim maktabida «Jajji askarlar» deb nomlangan tadbir bo'lib o'tdi. Unda boshlang'ich sinf o'quvchilari Vatanga muhabbat, burchga sadoqat, harbiy-vatanparvarlik mavzusidagi she'r, qo'shiqlarni mahorat bilan ijro etishdi. Tadbirda Qurolli Kuchlar faxriysi, shoir Iskandar Rahmon, Oqtepa mahallasi fuqarolar yig'ini faollari, aziz va tabarruk keksalar qatnashib, Vatan himoyasi – muqaddas burch, oliyjanob vazifa ekanini yana bir bor ta'kidlashdi.

O'z muxbirimiz

**Biz tinchlikning posbonlarimiz,
Nurga to'lsin osmonlarimiz!**

OZOD YURTNING BEK BOLASI

Poytaxtimizdagi 8-son bolalar musiqa va san'at maktabining 3-sinfida ta'lim olayotgan Bekzodjon NARIMONOVni «Marvarid» guruhi yakkaxoni sifatida yaxshi taniysiz. Yosh iste'dod egasi hozirda «Toshkent» teleradiokanali «Toshkent vaqti» dasturining «Shirintoy» sahifasi boshlovchisi. Bekzodjon «Vatan himoyachilari kuni»ga atab «Vatanim» qo'shig'ini ijro etdi.



MEHR ILDIZ OTGAN JOY

izzat-u hurmat maskanidir

O'zbekiston Respublikasi Konstitutsiyasining 22 yilligiga bag'ishlangan tantanali marosimda davlatimiz rahbari Islom Karimov 2015-yilni mamlakatimizda «Keksalarni e'zozlash yili» deb nom berishni taklif etdi.

Donishmand xalqimiz hamisha ezgulikka va yaxshiliklarga intilib yashaydi. Bu bizning qon-qonimizga, jon-jonimizga singib ketgan. Ayniqsa, mehrlil bo'lish, o'ta-onani hurmat qilish, buvi va buvajonlarimizni e'zozlash, qadrlash, ularga g'amxo'rlik ko'rsatish ibratli fazilatlarimizdan biridir.

2015-yilning «Keksalarni e'zozlash yili» deb nomlanishi jamoatchiligimizni, ayniqsa, o'quvchi-yoshlarni yanada quvontirdi. Prezidentimiz ma'ruzasida ta'kidlaganidek, «Bir o'ylab ko'raylik, «Qarisi bor uying

parisi bor», «Qariyalar – xonadonlarimizning fayzi va farishtasi» degan maqol va hikmatli so'zlarimizda qanday chuqur ma'no bor. Haqiqatan ham qaysi xonadonda nuroniy otaxon yoki onaxon bo'lsa, bu oilada, albatta, fayz-u baraka, farovonlik, ahillik

bo'lishini barchamiz yaxshi bilamiz». Bugun tahririyatimizga maktub yo'llayotgan gazetxonlarimiz o'z takliflarini aytishmoqda. Jumladan, «Savob ishini har kim qilishi kerak, savob ishini har kun qilish kerak», degan shiorga amal qilib, atrofdagi yolg'iz keksalar holidan xabar olish, ularga g'amxo'rlik ko'rsatish, og'irini yengil qilishni o'zlarining muqaddas insoniy burchlari deb bilishmoqda.

Yana shuni mamnuniyat bilan aytish mumkinki, Istiqlol yillarida O'zbekistonda uzoq umr ko'ruvchilar soni yanada ortdi. Ayni paytda yurtimizda 225 ming nafar 80 yoshdan, 44 ming nafar 90 yoshdan oshgan mo'tabar bobolarimiz va momolarimiz istiqomat qilishadi. Eng quvonarlisi esa 100 yoshdan oshgan tabarruk qariyalarimiz 8 ming 700 nafarni tashkil etmoqda.

Bu shundan dalolatki, qalbi bola kabi beg'ubor keksalarimizning, eng avvalo, ertangi kunga katta ishonch bilan qarashi, ezgu niyati, qolavasi, davlatimiz, farzandlar, nabira va evaralari tomonidan ko'rsatilayotgan hayot ranglariga jilo beruvchi cheksiz mehr va muhabbatdir.

Ajdodlarimizning buyuk merosini, qadriyatlarimiz va urf-odatlarimizni yoshlarga yetkazish, ularni Vatanga muhabbat, kattaga hurmat, kichikka izzat ruhida tarbiyalashda ibrat bo'layotgan keksalarimizni har qancha ardoqlasak, boshimizga ko'tarsak arziydi. Chunki bizning barcha erishayotgan yutug'-u rag'batlarimizga ularning ulkan mehnatlari-yu beminnat duolari sababdir. Shunday ekan, xonadonimiz ko'rki, fayz-u barokati bo'lgan buviyong va bobojonlarimizning cheksiz mehri bizga hamisha qanot, qalbimizni doimo yuksaklarga chorlashi, shubhasiz. Zero, mehr ildiz otgan xonadonda hamisha izzat-u hurmat, ezgulik va ibrat yashaydi.

Feruza SOYIBJON qizi

MUSTAQIL YURT

BOLALARI IQTIDORLIDIR

Buxoro viloyati, G'ijduvon tumanidagi 62-IDUMI 9-sinf o'quvchisi Kamron Komilovni «Prezident asarlari bilimdoni» deb atasak arziydi. Yaqinda o'tkazilgan «Prezident asarlarini o'rganamiz» ko'rik-tanlovining viloyat bosqichida faxrlil 1-o'rinni egallab, respublika bosqichida qatnashish huquqini qo'lga kiritdi.

To'rt shart asosida tashkil etilgan mazkur bellashuvda Kamronning «Prezident Islom Karimov – O'zbekiston yangi milliy davlatchilik asoschisi» mavzusida tayyorlagan slaydlari hakamlar hay'ati tomonidan yuqori baholandi. Kamron o'zining ijodiy ishida Prezidentimizning mustaqillikka erishish arafasida va Istiqlol yillarida amalga oshirgan ezgu ishlari va mamlakatimizning xalqaro hamjamiyatda munosib o'rin egallashi uchun olib borgan muvaffaqiyatli faoliyatini atroflicha yoritib bera oldi. Tarix va huquq fanlariga bo'lgan qiziqishi Kamronga ko'rik-tanlovning yana bir sharti, ya'ni test savollariga javob berishda juda qo'l keldi va bu fanlardan fundamental bilimga ega ekanligi uning raqiblaridan ustunligini ta'minladi.

Tarix va huquq fanlariga bo'lgan qiziqishi bu o'quvchida beshinchi sinfdaligidayoq uyg'ondi. O'z ustida tinmay ishlaydigan, tirishqoq bolakayning iste'dodini o'z vaqtida payqagan tarix fani o'qituvchisi Ilhom

Hamdamov o'quvchisi bilan darsdan bo'sh vaqtlarida mustaqil shug'ullana boshladi va uni «Yosh tarixchi» to'garagiga jalb etdi. Astoydil qilingan mehnat o'z natijasini berdi. 2011–2012-o'quv yilida «Bilimlar bellashuvi»ning respublika bosqichida 1-o'rinni qo'lga kiritdi. 2014–2015-o'quv yilida Viloyat hokimi stipendiyasiga sazovor bo'ldi. Bunday natijalarga erishishda, albatta, maktab-internet jamoasi va ayniqsa, ustozlardan Ilhom Hamdamov, Mehriddin Qilichevning mehnatini e'tirof etish o'rinni.

Kamron tarix va huquq fanlaridan tashqari ona tili va adabiyot, fransuz va ingliz tillari, matematika, iqtisod fanlariga qiziqadi, har bir fanni a'lo baholarga o'zlashtirib bormoqda. U hozirda fransuz va ingliz tillarida bema'lol so'zlasha oladi. Kelajakda huquqshunos bo'lishni orzu qilgan o'quvchi bilimini yanada boyitish, kelgusida o'z Vatani, xalqi uchun xizmat qiladigan mutaxassis bo'lish maqsadida tinmay izlanmoqda.

Nurbek NURALI o'g'li

Sevimli xonandang bilan uchrashish, qiziqirgan savollaringga javob olish, birgalikda jo'r bo'lib kuylashning zavqi o'zgacha bo'lsa kerak. Buni shahrimizning Yashnobod tumanidagi 198-maktab o'g'il-qizlari, ustozlaridan so'rang.

IJODIY

UCHRASHUVLAR DAVOM ETMOQDA



Bu yerda el suvgan san'atkorlar Rixsi Ibrohimova, Erkin Komilov, xushovoz hofiz Orolmirzo Safarov, so'z ustasi Valijon Shamshiyev, bolalarning sevimli adibi Xudoyberdi To'xtaboyev, yosh iste'dodlardan Dilshodbek Kattabekov kabi ijodkorlar bilan bo'lgan uchrashuv o'quvchilarda katta taassurot qoldirdi.

Yaqinda maktabda o'quvchilarga musiqa darsini o'tib berish Lola Yo'ldoshevaga nasib etdi. El sevgan san'atkor o'quvchilarga musiqa, qo'shiq ijtimoiy hayotda va inson madaniyatida o'ziga xos o'ringa egaligini ta'kidlab o'tdi. Bolalarni birgalikda kuylashga chorladi.

Bu kabi ijodiy uchrashuvlar o'quvchilarga quvonch baxsh etish bilan birga, go'zallikka intilish, bilim olish, mehnat qilishga undashi, shubhasiz.

Muzaffar AHMEDOV

ULUG' SHARAF

Safda bir tekis borayotgan, shaxdam odimlaridan yer larzaga tushadigan harbiylar safida bo'lishni orzu qilmaydigan bola topilmasa kerak. Vatani himoyasi - bu ulug' sharaf!

Sobirjonning ham dilida zobit bo'lish orzusi paydo bo'lganida hali 6-sinfda o'qib yurgan kezlari edi. Anchagacha ko'nglidagini birovgacha aytishga uyali yurdi. Nega, deya ajablanishingiz tabiiy. U sinfdoshlari orasida bilimdonligi bilan ajralib tursa-da, jismoniy tomondan biroz orqada edi. Harbiy bo'lish uchun esa baquvvat, har tomonlama sog'lom bo'lish kerakligini yaxshi bilardi.

Bir voqea esa uning orzusi va istagini yanada alangalatdi. Buvasi sihatgohda dam olayotganda otasi bilan ko'rishga bordi. Shundoqqina tog' etagida joylashgan bu maskan nihoyatda xushmanzara, havosi ham musaffo ekan. Buvasi bilan anchagacha chaqchaqlashib o'tirishdi. U kishi bilan xonadosh

Akbar buvayam xushchaqchaq odam ekan. Qiziq-qiziq voqealarni aytib berib, hammani rosa kuldirdi. Tabiatan kamgap Sobirjonni ham gapga solib ko'p narsani bilib oldi.

- Bolam, katta bo'lsang kim bo'lasan? - dedi Akbar buva unga mehriban qarab.

- Zobit bo'laman, - dedi Sobirjon sira ikkilanmay, hali hech kimga aytishga botinmagan orzusini Akbar buvaga aytib

yuborganidan o'zi ham hayron edi. - Zo'r-ku, - dedi bobo ko'zlari chaqnab. - Mening ikki o'g'lim harbiy. Nevaralarim ham shu yo'lni

tanlashgan. Ular yoshligidan chiniqishga zo'r berishadi. Sen ham shunday qilishing kerak. Eng asosiysi, erinch o q bo'lmaslik kerak. Ertalab barvaqt turib, badantarbiya qil, kun tartibingga jismoniy mashqlarni kiritib, ularni muntazam

bajarib borish payida bo'l. O'zingga talabchan bo'lsang, niyatingga, albatta, erishasan.

Bu gaplar bayram arafasida bo'lib o'tgandi. Sobirjon yangi yilni har yilgidan boshqacha boshladi. Uning darsxonasida yangi kun tartibi paydo bo'ldi. Erta uyg'onib, nonushtagacha ancha yumushlarni bajaradigan bo'ldi. Ancha vaqt o'tib o'zini ham ko'rdim. 9-sinfda o'qiyotgan ekan. Oldimda yelkalari keng, qo'llari baquvvat, bo'y-basti kelishgan o'spirin namoyon bo'ldi. Nigohlarida qat'iyat mujassam edi. Bu ko'zlarda o'ziga ishonch, mardonavorlik nurlarini ko'rgandek bo'ldim. Ko'nglimda allanechuk ilqlik jilva qildi. Vatani himoyasiga munosib o'g'lonlar voyaga yetayotgani naqadar zavqli, shunday emasmi?!

Yusuf FAYZULLO

SANGZORLIK KULOL HUZURIDA

Qishki ta'til kunlarida Jizzax shahridagi 1-umumta'lim maktabi o'quvchilari Sangzor mahallasida joylashgan kulolchilik ustaxonasida bo'lishdi. O'quvchilar ish kiyimi o'ziga yarashib turgan ustakulol Fayzulla Jo'rabekov harakatlarini kuzatishar ekan, uning butun diqqat-e'tibori navbatdagi buyurtmani nihoyasiga yetkazishga qaratilgandi.

Ustaxona sahni saranjom-sarishta, tokchalarga terib qo'yilgan guldon, gul tuvaklari va turli haykalchalarni ko'rib, beixtiyor hayratingiz ortadi. Bunda hatto XVI-XVII asrda ishlatilgan sopol lagan, ko'za, kosa kabi uy-ro'zg'or buyumlarini uchratishingiz mumkin. Usta o'tmishdagi hunarmandchilik buyumlarini haqida o'quvchilarga so'zlab berdi.

Kulolning shogirdlari har yili viloyat bo'yicha o'tkaziladigan barcha ko'rik-tanlovlarda gipsdan bezak uchun ishlatiladigan koshinlar, naqshlar, kichik hajmdagi haykalcha va o'yinchoqlari bilan ishtirok etib kelishadi.

Ha, aytmoqchi, usta Fayzulla aka shahar maktablarida ham bo'lib, o'zi yasagan haykalcha va o'yinchoqlarni kichintoylarga sovg'a qilib turadi.

Feruza ABDULLAYEVA, Jizzax viloyati



ENDI BIZ HAM «TONG YULDUZI» O'QIYMIZ

deyishmoqda 1-«E» sinf o'quvchilari

Poytaxtimizning Sirg'ali tumanidagi 300-IDUM o'ziga xos an'analarga ega bo'lgan bilim maskanlaridan biri hisoblanadi. Uch mingga yaqin o'quvchi ta'lim olayotgan mazkur maktabning to'qqizta 1-sinflari navbatma-navbat savodxonlik bayramini o'tkazishdi. Har bir sinf tadbiriga puxta hozirlik ko'rgan, bayram ishtirokchilari o'tgan ikki chorak davomida olgan bilimlarini bor mahorat bilan ko'rsatishga harakat qildilar. 1-«E» sinf o'quvchisi Jamoliddin Solijonovning «Endi biz ham «Tong yulduzi»ni o'qiy olamiz», deyishi zaldagi mehmonlarning olqishiga sazovor bo'ldi. Lola Azimova rahbarligidagi o'quvchilar o'z chiqishlari bilan ota-onalar va ustozlariga o'zgacha zavq ulashishdi.

Tadbir so'ngida o'quvchilarga



ajoyib ertak kitoblar va esdalik sovg'alari topshirildi.

Alisher FAYZULLAYEV

BIZNING SEVIMLI NASHR

Maktabimiz Buyuk Ipak yo'li bo'yida, Elobod shaharchasida joylashgan. 350 nafar o'quvchi ta'lim olayotgan bu maskanda hamisha bahor, rang-barang gullar yashnab turadi.

Bizda ochiq darslar, bayram tadbirlari muntazam tashkillashtiriladi. Hatto respublika miqyosida «O'rgan, o'rgat» o'quv seminari ham bo'lib o'tdi.

Maktab o'quvchilari «Tong yulduzi» gazetasini sevib mutolaa qilishadi. Ayniqsa, men rahbarlik qilayotgan 2-«V» sinf o'quvchilarining 11 nafari bu nashrga yakka tarzda obuna bo'lishdi. Gazetaning navbatdagi sonini sabrsizlik bilan kutayotgan o'quvchilarimdan A.Ashirbayev, S.Umrzagova, S.Ashirbayeva, D.Turqanbayeva, A.Rejepova, O.Kenjabayeva, N.Sobirov, N.Sagidullayev hamda M.Shukurallayeva, G.Muratbayeva, D.Aytbayevdan iborat mazkur sinf faollari o'z tengdoshlarini kirib kelgan Yangi yil bilan muborakbod etadi.

Bazargul SAPAROVA,

Qoraqalpog'iston Respublikasi, Qo'ng'iro't tumanidagi 52-umumta'lim maktabining 2-«V» sinf rahbari



BAYRAM ZAVQI

Mana, qishki ta'tilni mazza qilib o'tkazdik. Katta-yu kichikka birdek

yoqimli bo'lgan Yangi yil bayrami zavqi hali tugagani yo'q.

Xonadonimiz fayzi bo'lgan buvijonimizni bayram bilan tabriklash uchun barcha qarindoshlar mehmon bo'lib kelishdi. Biz bolalar jam bo'lib, poytaxtimizning ko'rki bo'lgan - Mustaqillik maydoniga yo'l oldik. U yerda chiroyli bezatilgan ulkan archani ko'rib, dilimiz quvnadi.

Qishki ta'til kunlarida maktabimizda «Bilimlar bellashuvi»ning birinchi bosqichi o'tkazildi. Sinfimizdan men bilan birga to'rt nafar o'quvchi ona tili va adabiyot fanidan bellashuvda ishtirok etdik. Maqsadimiz, bilimlar sinovining respublika bosqichida ham qatnashib, ota-onamiz va ustozlarimiz ishonchlarini oqlash.

E'zoza USMONXO'JAYEVA, poytaxtimizning Shayxontohur tumanidagi 34-umumta'lim maktabining 6-«V» sinf o'quvchisi



N. SULTONOV oigan surat

USTOZDAN SOVG'A OLAMIZ

Gulchehra Ergasheva dars o'tayapti. Doskaga chiroyli qilib sana, mavzu yozilgan. U, avvalo, o'quvchilaridan o'tilgan mavzuni o'yinlar orqali so'raydi. Yangi mavzuni o'zi yasagan turli ko'rinishdagi ko'rgazmalar vositasida tushuntiradi. O'quvchilarning bilimiga ishonch hosil qilgach, o'zlashtirishi qiyin o'quvchilar bilan alohida shug'ullanadi.

Tajribali muallimaning bugungi kunda H. Nazarova hamda H. Urdusheva kabi shogirdlari bor, ustozdan o'tmagan shogird shogird emas, deganlaridek bu yosh pedagoglar ustozlari bilan yonma-yon zamond talablari darajasida yosh avlodlarga ta'lim-tarbiya berib kelmoqda.

Muallima 26 yildirki, jajji bolajonlarga o'qish va yozishni o'rgatib kelmoqda. Maktabsiz, bolalarisiz hayotini mukammal tasavvur etolmaydigan opa bir so'zni takror-takror aytib charchamaydi: «Kasbim – bu mening faxrim!»

– Kelajakda ustozim singari pedagog bo'lmoqchiman, – deydi faxrlanib Xurshid Hakimov. – Men va sinfdoshlarim o'qituvchi kasbiga juda qiziqamiz.

Dam olish kunlari qo'shni bolalar bilan «O'qituvchi-o'quvchi» o'yinini o'ynaymiz. Men bunda doim o'qituvchi rolini bajaraman. Gulchehra opamday darsni tushuntirishga harakat qilaman, ustozim kabi hozirjavob «o'quvchi»ga darrov a'lo baho qo'yaman.

Darvoqe, o'qituvchimiz sinfdagi eng faol o'quvchilarni o'zi yasagan bejirim o'yinchoqlar bilan rag'batlantirib boradi.

Bolalarning beg'ubor dunyosida yashashni baxt deb bilgan Gulchehra Ergashevaning shiori shunday: «Maktab – men nafas olayotgan dunyo!» Eng muhimi, mamlakatimizning kelajagi, tayanchlari voyaga yetyapti. Gulchehra opa mana shunday hislarni dilidan o'tkazar ekan, maktabga, pedagoglarga hukumatimiz tomonidan qaralayotgan katta e'tiborni baxt, iqbol, saodat ramzi, deb biladi.

Nurbek QIDIRALIYEV

BALLI, NATASHA!

Poytaxtimizning Miroybod tumanida joylashgan 31-umumta'lim maktabida Natalya ismli bir o'quvchi bor. 7-«V» sinfda tahsil olayotgan koreys millatiga mansub bu qizcha o'zbek tilida ravon so'zlay oladi.

Tarix, jismoniy tarbiya darslariga qiziqadigan Natasha o'zbek tili darsida ham hozirjavob o'quvchilardan. Buning ustiga Sevinch, Madina kabi dugonalari uning o'zbek tilini o'rganishida eng yaqin ko'makchilari. Natalya Pak maktabda o'tkaziladigan tadbirlarda ona Vatan, yurtimiz tinchligi haqida she'rlar o'qiydi. Bilimga chanqoq o'quvchisidan sinf rahbari Yevgeniya Vladimirovna ham minnatdor. U bo'sh vaqtlarida rasm chizishni xush ko'radi. Kelajakda stilist-dizayner bo'lishni orzu qilgan uddaburon qiz Yangi yil bayramida dugonalarning sochini o'zi turmaklab qo'ydi. Orzularing amalga oshsin, balli, Natasha!



SHAHRIXONLIK VAZIRA

Andijonning Shahrixon tumanidan Vazira Zaynobiddinova badiiy ijodiyot yo'nalishidagi «Yosh musavir» turkumida Istiqlol yillarida erishilgan yutuqlar, ulkan bunyodkorlik ishlari, baxtli bolalik kabi betakror lahzalar aks ettirilgan rasmlari ko'rgazmasi bilan ishtirok etdi. Tumandagi 4-umumta'lim maktabining 6-sinf o'quvchisi «Barkamol avlod» bolalar markazining


tasviriy san'at to'garagi faol a'zosi. Uning tasviriy san'atga bo'lgan qiziqishida ustozlari Asalxon Mashrapovaning o'rni beqiyos.

Tashkilotchilik, boshlovchilik qobiliyatiga ega bu qiz maktabi va Markazdagi tengdoshlari orasida o'z o'rniga ega. Vazira voqelikni tez ilg'aydi, teran fikrlab, shunga yarasha munosabat bildiradi. U o'z ustida tinimsiz izlanadi. Ayniqsa, tasviriy san'atning qalamtasvir, rangtasvir yo'nalishlarida zavqlanib ijod qiladi. Jonajon o'lkamizning betakror tabiati, maftunkor manzaralari unga ilhom baxsh etadi. Maskanda o'tkaziladigan ma'naviy-ma'rifiy tadbirlarning faol ishtirokchisi. Yosh musavir buyuk ajdodlarimiz qoldirgan boy ma'naviy merosni o'rganishga, uni targ'ib qilishga astoydil bel bog'lagan. Iqtidorli o'quvchi «O'zligingdan aylanay, o'lkam», «Chimyon sadosi – 2014», «Bolalar va suv» respublika ko'rik-tanlovlarda ishtirok etib, g'oliblikni qo'lga kiritdi.

Shahrixonlik Vazira kelgusida bilim va ko'nikmalarini yanada kengaytirib, zamonamizning eng ilg'or, fidoyi insonlaridan biri bo'lib yetishiga ishonamiz.

FERUZA

OLMOS RISHTA



– O'g'lim, aytganlarimni olib keldingmi? – Sultonmurod aka farzandini shunday savol bilan kutib oldi.

– Ha, ota. Mana non, mayiz, tursnak, yong'oq... – Baxtiyor qo'lidagi paketni baland ko'tarib ko'rsatdi.

– Bo'lmasa yechinma, o'g'ling Anvarjon darsini tayyorlab bo'lgan bo'lsa, uniyam chaqir, kiyinsin, Olimjon amakingni ko'rib kelamiz, – dedi Sultonmurod aka.

Baxtiyor dadasiga hayron bo'lib qaradi. Axir dadasining ukasi ularga begona qilmaydigan yomonlikni

qilgan-ku.

Amakisi mushkul ahvolda qolganida Sultonmurod aka mashinasini sotib, ukasini qarzdand qutqargan edi. O'shanda amakisi:

– Rahmat, aka. Berganingiz menga qarz, qaytaraman, – degan odam vaqt o'tib, olgan qarzidan tonib yubordi.

– Akam o'tirgan hovli otobobomizdan qolgan. Unda mening ham haqqim bor. Akamning bergan puli shu hovlidagi haqqim ustidan, – dedi.

Shu-shu aka-uka orasiga sovuqchilik tushgan, bordi-keldi to'xtagan edi. Nega endi dadasidan birdan ukasini kiga boradigan bo'lib qoldi?!

Baxtiyor otasiga bu savolni bera olmadi. Shu bois:

– Anvarjon, tur, Olimjon buvangni ko'rishga borar ekanmiz, – dedi.

Olimjon aka ham, ayoli ham ularni oradan hech narsa o'tmaganday xursand qarshi olishdi. Ayniqsa, xastalanib, biroz rangi salqib qolgan

Olimjon aka ularni qayerga o'tkazishni bilmasdi, ko'zlari yoshlandi, qo'llari duodan bo'shamadi. Qaytishda Baxtiyor jur'at qila olmagan savolni Anvarjon berdi.

– Buva, Olimjon buvam sizni xafa qilgan ekanlar-ku. Siz ularni kechiringizmi?

– O'g'lim, jigarlar bir-biriga tabiiy mehr – olmos rishta bilan bog'lanadi. Bu mehming umriga umr qo'shish vazifasi ham bizga omonat. Inson kechirimli bo'lishi kerak. Kechirimli inson hech qachon yutqazmaydi, – dedi.

Va ancha yurgach Anvarjondan:

– Nima demoqchi bo'lganimni tushundingmi, o'g'lim? – deb so'radi. Anvarjon boshini silkib:

– Tushundim, buvajon, – dedi.

Qutlibeka RAHIMBOYEVA, O'zbekistonda xizmat ko'rsatgan madaniyat xodimi


Lesson 18

OUR FAVORITE LESSON

(Biz yoqtirgan dars)

- said in Jizzakh city 22th of boarding school 1-«A» form pupils.

They learn English through listening, and learn by heart different poems and funny songs. The pupils are very active and their teacher Dilshoda Rahmatova teaches them with great interest. It's very enjoyable during the lesson, Mahmudov Foziljon and Alijonova Dilnura are excellent pupils in the class.



MODAL VERBS

(Modal fe'llari)

May and might

May hozirgi va kelasi zamondagi taxminni ifodalashda ishlatiladi va o'zbek tiliga «mumkin, balki» deb tarjima qilinadi.

For example: He may come to Tashkent in the summer.

Take an umbrella with you. It might rain.

May/might ruxsatni ham ifodalaydi:

- May I sit here? - Yes, of course.

May I come in?

You may take my dictionary.

May/might bo'lishsiz gaplarda ham ishlatilishi mumkin:

For example: She may not know her address. Farkhod may not come to work tomorrow, he is ill.



PICTURE GAME

(Rasmli o'yin)



Night



October



Mother's Day



Separate them into 3 groups:

In

On

At



Monsoon




Monday

FIND THE SYNONYMS

(Sinonimlarni toping)

Find the synonyms from these balloons, don't forget to translate and learn by heart them:

1. Ancient - _____, _____
2. Begin - _____, _____
3. Collect - _____, _____
4. Meaning - _____, _____
5. Gold - _____, _____



Ibrohim FAYZIRAHMONOV,
Toshkent viloyati, O'rta Chirchiq tumanidagi
54-umumta'lim maktabi o'quvchisi

FUNNY TESTS

1. I have ... cat. ... cat is gray.
a) a/the b) the/a c) a/a d) the/a
2. My book is ... the bookcase.
a) under b) in c) on d) at
3. What is ... name? - His name is Tom.
a) my b) you c) his d) her
4. Where ... Lilly's doll? - It ... in the bedroom.
a) are/is b) is/are c) are/are d) is/is
5. Jill and Lilly ... married.
a) isn't b) is c) are d) am

Gulnora TOSHQULOVA,
Sirdaryo viloyati, Xovos tumanidagi 7-umumta'lim maktabining
8-«A» sinf o'quvchisi

EASY QUIZ

(Boshqotirma)

Jobs

What do these people do? Put a in the correct box.

1. An artist
- Draws pictures
- Drives cars
- Makes clothes



2. A gardener
- Builds the buildings
- Cooks meals
- Looks after garden

Iroda MIRZAYEVA,
O'zDJTU talabasi

SOLDIERS

(Askarlar)

Crossing the world, ground, sea and air,
Giving our country great care.

These mighty warriors helping us in times of need
Doing us all a very good deed.

Defending and protesting from foreign invaders
Traveling across mountains, deserts and glaciers.

Fighting along with our gallant flag
Proudly raising it high, never letting it sag.

A rigorous job only fit for the best
During their work they rarely rest.

Helping our nation prosper and grow
These soldiers deserve a great big bow.

Umida UMAROVA

TONGUE TWISTERS

(Tez aytishlar)

Do tongue twisters twist your tongue?

A good cook could cook as much cookies,
as a good cook who could cook cookies.

Dinara SHAKIROVA tayyorladi

«TONG YULDUZI» - MENING YULDUZIM

Tahririyatimizga o'quvchilardan keladigan maktublarning sanog'iga yetib bo'lmaydi. O'z navbatida xodimlarimiz ham ularning birortasini e'tibordan chetda qoldirmaslikka harakat qilishadi.

– Men she'r va maqola yozishga qiziqaman, har gal qo'limga qalam olsam, she'rimni qaysi gazetaga yuborsam ekan, degan o'y xayolimdand kechadi, – deya maktub yo'llabdi Xorazm viloyati, Qo'shko'pir tumanidagi 17-umumta'lim maktabi o'quvchisi Inoyatoy Rahimova. – Mazkur yil uchun butun sinfimiz bilan sevimli nashrimiz «Tong yulduzi»ga obuna bo'ldik. Endi hech ikkilanmay sevimli gazetamga she'rларimni yuboraman. «Tong yulduzi» mening yaqin do'stimga aylandi, desam xato bo'lmaydi.

Yangi yilda Inoyatoydan kelgan maktub barchamizni birday quvontirdi.



BUVIJON, MEN SIZNI YAXSHI KO'RAMAN

Sho'xliklarim haddan oshadi ba'zan, Besabab injiqlik qilganimda ham. Beozor jilmayib qo'yasiz har dam, Kechirib ketasiz, indamaysiz ham. Buvijon, men sizni yaxshi ko'raman.

Duolar qilasiz katta bo'lg'in, deb, Doimo salomat, o'ynab yurgin deb, Baxtli bo'lg'in, deysiz, aqli, dono, Elning xizmatida bo'lg'in doimo, Buvijon, men sizni yaxshi ko'raman.

Inoyatoy RAHIMOVA,
Xorazm viloyati, Qo'shko'pir tumanidagi 17-umumta'lim maktabining 3-sinf o'quvchisi

VATAN

Bayrog'ingni o'pib ardoqlab, Tuprog'ingni surtay ko'zimga. Oqlash uchun onam armonin, So'z berganman o'zim-o'zimga.

Amir Temur, Mirzo Boburlar Vatani uchun to'kkan qonini. Onam aytgan ertakda Shiroq, Ado etgan shirin jonini.

Goh do'l yog'ar, goho yomg'ir, qor, Tunda kiprik qoqmay tik turgan. Shamolday, tez shijoat shaxti, Vatani nomin yurakka o'ygan.

Berib qo'yman qora bulutga, Yurtim tiniq osmonlarini. Yovlar bilmas bizday yurtsevar, Vatani sevar posbonlarini.

Qush uyada ko'rganin qilar, Ukalarim borar izimdan. Qo'lchasida o'yinchoq qurol, Men askarman, deb surar xayol.

Vatani nima, degan savolga, Vatani – bu yer, Vatani osmonim, Degani javob oldim ukamdan, U ertangi kunning posboni.


Muhiddin UBAYDULLAYEV,
Qashqadaryo viloyati, Nishon tumanidagi 3-umumta'lim maktabining 6-«A» sinf o'quvchisi

SHE'RIYAT

Oltindan-da qimmatli, Saxiydarsan himmatli. Har bir satring hikmatli, Ma'nodirsan she'riyat.

Eng yaqin hamrohimsan, Sirdoshimsan she'riyat. Hayot yo'limda mangu, Yo'ldoshimsan she'riyat.

Jahongir NAMOZOV,
Namangan viloyati, Pop transport va aloqa kolleji o'quvchisi



Esimda, bolaligimda Yangi yil arafasida quloq qalinlikda qor yoqdan edi. 3-sinfda o'qirdim, «Archa bayram»ini va Qorboboni orziqib kutardim. O'shanda men bolalikning ertaklar olamida yashardim, xayolimdagi Qorbobo oq ot mingan, uning yonida afsonaviy Shahzoda bo'z otini gijinglatib turar, har ikki arg'umoq qanotli edi.

Ularning sovg'alarni qabul qilib olib, minnatdorchiilik bildirganimdan so'ng, Shahzoda meni otiga mingashtirar, biz Qorbobo hamrohligida osmon-u falakka parvoz etib, tuni bilan bolalarga sovg'a ulashardik.

Bolalik ekanda, men o'z xayolimda, o'zim to'qigan ertaklarimga chippa-chin ishonardim. Aslida sovg'alarni maktabda Qorbobo rolini o'ynaydigan otam va institutda o'qiydigan akam olib kelishar ekan.

Otamning Qorbobo ekanligiga butun maktab ishonardi-yu, birgina men ishonmasdim. Chunki boshlang'ich sinf o'qituvchisi bo'lgan otam Qorboboning oppoq soqolmo'ylovini ham, uning sovg'a-salom to'la to'rva-xaltasini ham uyda tayyorlardi. Tabiiyki, bu mening nazarimdan chetda qolmas, otam Qorbobo ekanligiga sira ishonmasdim. Shu bois, qanotli ot mingan Qorbobo va afsonaviy Shahzoda haqida ertak to'qib, sinfdoshlarimga aytib berardim, ular ham ishonaqolishar, Yangi yil yanada qadrli, quvnoq bayramga aylanardi.

Qanotli arg'umoglar

Yangi yil hikoyasi



Archa bayramiga bir kun qolganida otam odatdagidek Qorbobo bo'lishga hozirlana boshladi. Men esa zo'r berib qanotli otlar, Qorbobo, Shahzoda haqida yangi ertak to'qishga kirishdim. Lekin negadir bu galgi ertagim juda g'amgin, diydalarim oldida turib qolgan arg'umoqlar qanotsiz, Qorbobo va Shahzodaning chehrasi tundi edi. Buning sababini hech tushunib yetolmadim.

Nihoyat, otam ertangi bayram uchun hamma narsani taxt qilib bo'lgach, uchalamiz sandal atrofida ovqatlanishga o'tirdik.

Otam o'sha, xayolimdagi Qorboboga o'xshab horg'in, ma'yus edi. Piyoladagi choyga bir muddat tikilib turgach, onamga yuzlandi:

- Onasi, Yahyojonning (akam) eski boshmoqlari qayerda?
- Qayerda bo'lardi, qaznoqda chang bosib yotibdi.
- Shulardan kiysi bo'ladigan bir juftini topib bersang...
- Eski boshmoqlarni nima qilasiz?

Onam taajjublandi-yu, darhol hovliga chiqib ketdi.

Oradan ko'p o'tmay, nimdoshgina bo'lsa-da, qo'nji baland bir juft boshmoqni olib keldi.

– Mana bu boshqa gap! – dedi otam poyabzalning u yoq-bu yog'ini aylantirib ko'rgach, – buni qorda ham, yomg'irda ham kiysi bo'laveradi. Hozir moylab, yap-yangiday qilib qo'yaman!

O'z navbatida endi men ham hayron bo'ldim.

– Ota, menga buning keragi yo'q! Botinkamni hali kiysi bo'laveradi.

Onam ham otamga savol nazari bilan qarab turardi.

– Bu senga emas, o'g'lim, – dedi otam «uf» tortib, – buni Bo'ron bor-ku, mening sinfimda o'qiydigan,

o'shanga eltib berasan. Qor yoqqanidan beri, uch kundirki, maktabga kelolmaydi, oyoq kiyimi yo'q ekan...

Nega bugungi ertagim mahzun ekanligini tushunib yetganday bo'ldim.

Otam eski boshmoqlarni haqiqatan ham yangiday qilib moyladi. Men erta tongda uni qishloq chekkasida yolg'iz onasi bilan yashovchi Bo'ronga eltib berdim.

Bo'ron poyabzalning u yoq-bu yog'ini aylantirib ko'rdi, so'ngra ko'ksiga bosdi.

– Ur-r-e! Yashasin! Men bugun maktabga boraman! Archa bayramiga boraman!.. – bolaning mungli ko'zlarida yosh mavjlandi.

O'sha kungi Yangi yil bayrami juda qiziqarli o'tdi. Bo'ron hamma bolalarga qo'shilib archa atrofni aylanar ekan, onda-sonda o'zining yarqirib turgan oyoq kiyimiga o'g'rincha nazar tashlab qo'yardi.

Shu kuni men ham juda yayradim. Endi negadir otam haqiqiy Qorbobo ekanligiga ishongim keldi...

Men hamon ertaklar olamida yashayman. Bu ertaklarimni nevaralarimga aytib beraman. Ular diqqat bilan tinglashadi, eng muhimi, ishonishadi.

Kenja nevaram – ikki yashar Alisherbek archa o'yinchoqlariga talpinib, qiyqirib kuladi, qo'llarini baland ko'taradi. U ham oq arg'umoqda osmon-u falakka parvoz etayotgan bo'lsa, ne ajab?!

Jo'ra FOZIL



FAQAT OLG'A, SHOHSANAM!



Shohsanam Egamberdiyeva Andijon viloyatining Bulqoboshi tumanidagi 16-umumta'lim maktabining 7-«A» sinfida o'qiydi.

Oilada uch nafar farzandning to'ng'ichi bo'lgan Shohsanam maktabda ingliz tili, tarix, matematika fanlariga qiziqadi. Bo'sh vaqt topildi deguncha liboslar dizaynini yaratish ustida bosh qotiradi. Yosh iste'dod sohibi sportda ham o'z o'rniga ega chempionlardan. Shohsanam salkam besh yildan beri ustoz Xolida Rahmonovadan karatening «Shotakan» yo'nalishi sirlarini o'rganib keladi. Sportchi o'tgan yillar davomida viloyat birinchiligidagi faxrli 3-, viloyat chempionatida 1-o'rin, O'zbekiston kubogida esa 2-o'rinni egallab, murabbiy ishonchini oqladi. Uning kelajakdagi orzusi mamlakatimiz bayrog'ini jahon arenalarida baland ko'tarib, yurt dovrug'ini dunyoga taratish.

Orzularing amalga oshsin, Shohsanam!

FARG'ONALIKLAR XALQARO MAYDONLARDA

Bugungi kunda An'anaviy taekvando Federatsiyasi Farg'ona viloyat bo'limida olib borilayotgan ishlar diqqatga sazovor.

Asosiy faoliyati o'g'il-qizlar orasida sog'lom turmush tarzini targ'ib qilish, ularni vatanparvarlik ruhida tarbiyalashdan iborat Markaz yoshlari so'nggi yillarda O'zbekiston chempionati va kubogi musobaqalarida yuqori o'rinlarni egallab kelmoqda. Murabbiylar bugungi kungacha 2 nafar jahon chempioni, 1 nafar jahon chempionati sovrindori, 3 nafar Osiyo chempioni, 4 nafar xalqaro musobaqalar g'oliblari va 15 nafardan ziyod O'zbekiston chempionlarini tarbiyalashdi. Sportchilar o'tgan davr maboynda ko'plab yutuqlarni qo'lga kiritishdi.

Vyetnamda bo'lib o'tgan Osiyo chempionati musobaqasida Botir Bahodirov kumush va bronza medallariga sazovor bo'lgan bo'lsa, Baxtiyor Odilov bronza medalini qo'lga kiritdi. Shuningdek, 2014-yilda Gollandiyada o'tkazilgan xalqaro musobaqada Asadbek Nabiyeov 1-o'rin, Turkiyada o'tkazilgan xalqaro musobaqada Bobir Sobirjonov va Asadbek Hakimov 1-o'rin, Kiprda o'tkazilgan xalqaro musobaqada Azamat Nishonov 2-o'rinni egalladi.



O'tgan yili erishilgan muvaffaqiyatlardan yana biri Italiyaning Rim shahrida o'smirlar o'rtasida o'tkazilgan jahon chempionatida eng og'ir vazn toifasida ishtirok etgan sportchi Baxtiyor Odilov kumush medal sovrindori bo'ldi.

Markazda «Keksalarni e'zozlash yili» munosabati bilan chekka hududlarda yashaydigan aholi uchun sport mashg'ulotlari tashkil etish, keksalar va qariyalarni sog'lomlashtirish ishlarini uyushtirish, ayollar va yoshlar o'rtasida tizimli sport musobaqalarini tashkillashtirish masalalari rejaga kiritildi.

**Nabijon TEMIROV,
Muhammadsodiq ALIMOV
tayyorlashdi**



UMID NIHOLLARI - 2014

Yaqinda Guliston shahar XTMFMT va TE bo'limiga qarashli 6-umumta'lim maktabi sport bazasida boshlang'ich sinflar o'rtasida badiiy gimnastika bo'yicha «Umid nihollari - 2014» Guliston shahar ochiq turniri bo'lib o'tdi. Musobaqada jami 60 nafar sportchi-qizlar ishtirok etdi. Qizg'in va maroqli o'tgan mazkur turnirda shijoatli sportchilar arg'amchi, halqa, bulava hamda lenta va predmetsiz harakatda o'z mahoratlarini namoyish etishdi. Qizlarimizni kelajakda yetuk va har tomonlama mukammal inson qilib tarbiyalashdek maqsadni ko'zlagan ushbu musobaqada mutlaq g'oliblik Muborak A'zamovaga badiiy gimnastikaning halqa, Madina Abduqodirovaga halqa va arg'amchi, Mushtariy Habibiddinovaga halqa va lenta hamda Mohira Hurramovaga lenta turi bo'yicha nasib etdi. Madina Mamadaliyeva, Dilnoza G'aniyeva, Madina Bo'stonova, Nigora Zokirovalar 2-o'rinni egallashgan bo'lsa, 3-o'ringa Dilnoza Allayorova, Zulfiya Mamatqulova, Mastura Mahkamboyevalar loyiq topildi.

Viloyatda bu kabi musobaqalarning uyushtirilishi o'quvchi-qizlarning sportning bu yo'nalishida tajriba almashishlarida alohida ahamiyatga ega.

G'oliblar Guliston shahar Madaniyat va sport ishlari bo'limi hamda Xotin-qizlar qo'mitasi diplom va esdalik sovg'alari bilan taqdirlandi.

**Qachonlardir
Qashqadaryo
viloyatining chekka Pomuq
qishlog'ida ko'cha changitib,
o'rtog'lar orasida kurash
o'rtog'lar g'olib chiqib,
tushganda g'olib tuyg'ular
ko'nglida allanechuk iliq tuyg'ular
uyg'onib, astoydil quvongan bola
bir kun kelib o'z yurti bayrog'ini
katta shohsupalarda balandga
ko'tarishga muyassar
bo'lishini kim o'ylabdi,
deysiz.**

TINIMSIZ MASHG'ULOTLAR SABAB...

Qahramonimizning bunday yutuqlarga erishishida poydevor vazifasini o'tagan Buxoro tuman maxsus sport maktab-internati va u yerdagi o'qituvchi-murabbiylar bo'lajak yosh chempiondagi iqtidorni ilg'ab, bor g'ayratlarini sarflab, Sardor Jangeldiyevni respublika va xalqaro musobaqalar sari yetakladilar.

Sardor Buxoro tuman maxsus sport maktab-internatining 5-sinfiga barcha imtihonlarni muvaffaqiyatli topshirib, qabul qilingan kunini quvonib eslaydi. Xushxulqligi bois, tezda tengdoshlari va murabbiylari e'tiborini qozondi. Tinimsiz mehnat va uzluksiz mashg'ulotlar yosh sportchiga omdalar eshigini ochdi. O'tgan yillarda turli respublika turnirlari hamda viloyat birinchiliklarida g'oliblikni qo'lga kiritgan.

2014-yil Andijon shahrida o'tkazilgan respublika birinchiligidagi 42 kg. vazn toifasida 2-o'rinni qo'lga kiritib, mutaxassislar e'tiborini qozondi. Buxorolik navqiron kurashchi Sardor Jangeldiyevning g'alabalari oldinda. Vatanimiz bayrog'ini jahon shohsupalarida ko'p bora ko'tarishiga ishonamiz. Ayni paytda mas'uliyatli vazifani ado etishda unga kuch-g'ayrat, shijoat tilaymiz.

Shukrulla G'ULOMOV



CHANA UCHAMIZ

Ey, bolalar, kelingiz,
Biz yasagan tepaga.
Qiyaligin ko'ringiz,
Rosa mosdir chanaga.

Kelmay qolmang uyalib,
Yo'qdir deya chanamiz.
Bizda borin dam olib,
Galma-galdan uchamiz.



Haydar MUHAMMAD,
«Do'stlik» ordeni sohibi

YONG'OQ QOQISH


Amakim yong'oq qoqar,
Oh yong'oq! Bizga yoqar.

Duv-duv tushar yong'oqlar,
Terib olar o'rtoqlar.

Chaqib yesang, mag'izli,
Non-mi, deysan jizzali.

Soqqasini tanlaymiz,
«Qubba»-«Qubba» o'ynaymiz.

Amakim yong'oq qoqar,
Oh, yong'oq! Bizga yoqar.



SAYRA, ZAG'IZG'ON

Bir sayragin zag'izg'on,
Uyga kelsin ko'p mehmon.
Shokolad, konfetlardan,
Onam yozsin dasturxon.

BIZNING OILA

Mening dadam quruvchi,
Oyim esa tikuvchi.
Akam jasur, mard o'g'lon,
Vatanga turar posbon.

Mening o'zim bog'bonman,
Bu tuproqni sevaman.
Daraxtlar hosil berar,
Ko'nglim mehnatdan to'lar.

Oilamiz quvonchi,
Ahillikka undaydi.
Ota-onam ishonchi,
Bizni doim qo'llaydi.

Bekzodjon HAMIDULLAYEV,
poytaxtimizdagi 219-umumta'lim
maktabining 4-«A» sinf o'quvchisi

«AQLLI» PULT

Ota uyda televizor ko'rib o'tirardi. Xonaga 4 yoshli Hojiakbar kirdi. Ikkovlashib yovvoyi hayvonlar hayotidan lavhalar tomosha qila boshlashdi. Shu payt ayvonda telefon jiringlab qoldi. Ota qo'lidagi televizor pultini divanga qo'yib, qo'ng'iroqqa javob berish uchun chiqdi. Qaytib kirs, televizor o'chiq. Ota farzandini so'roqqa tutdi:

– O'g'lim, televizorni nega o'chirding?

– Men o'chirganim yo'q...
– Xonada sendan boshqa hech kim yo'q-ku...

Hojiakbar biroz o'ylanib turdi-da, qo'lidagi pultni ko'rsatdi:

– Dada, televizorni mana bu pult o'chirdi.

Jamshid RASULOV

KO'NGIL GULSHANI

Aziz bolajonlar!

Biz yoshi ulug'larni qanchalik hurmatlasak, e'zozlasak, ertangi avlod ham bizlarni shunday qadrlaydi. Shu xayollar og'ushida o'tirganimda, xonaga doimiy muxlislarimizdan biri, bo'kalik 90 yoshli Saidikrom ota kirib keldi. U kishining g'ayrat va shijoatini ko'rib, havasimiz keldi. Chunki otadagi hayotga bo'lgan muhabbat, jo'shqinlik bizni zavqlantirdi-da. Har bir so'zidan, o'gitidan olam-olam saboq oldik. So'z gavharlaridan ba'zilarini sizga ham ilindik:

O'qigan inson o'tirib ham olamni ko'radi, o'qimagan yurib ham dunyoni teran ko'z bilan ko'ra olmaydi.

Ko'ngillarning sururi ilmdandur,
Ko'rar ko'zlar nuri ilmdandur.

Hamisha yaxshilarni izlab yashadim.
Qayda yaxshi odam bor desalar,
erinmadim. Borib ularning suhbatini
oldim. Bildimki, inson umri davomida
yaxshilarni izlab, ulardan saboq
olib yashashi kerak ekan.

Saidikrom SAIDMAHMUDOV



YOSH MUSAVVIRNING SEHRIY OLAMI



«Eski shahar ko'chalari»



«Qish manzarasi»

Nafisa Nazarova Buxoro shahridagi 39-IDUM 7-«A» sinf o'quvchisi. U mo'yqalam yordamida ona shahri manzaralari, ertak qahramonlarini tasvirlaydi. Nafisaning beg'ubor qalbi musiqa-da hamohang. Skripka kuylari orqali ko'ngil go'zalligi, hayratlarini qog'ozga tushiradi. «Kamalak yulduzlari – 2014» tanlovi viloyat bosqichi faol ishtirokchisining orzulari bir olam. U kelajagi buyuk yurtning munosib farzandi bo'lishiga ishonadi.

BO'SH O'TIRMA, BOSH QOTIR!

BOSHQOTIRMA

Quyidagi kataklarga mos keladigan qushlar nomini yozing.

		Q		
		U		
		Sh		
		L		
		A		
		R		

Iqbol MALIKOVA

8

12-yanvar 2015



Bosh muharrir
Feruza ADILOVA

Navbatchi
muharrir
Yusuf
ABDULLAYEV
Rassom
Feruzbek
KAMOL o'g'li

Manziliimiz:
Toshkent shahri,
Navoiy ko'chasi, 30-uy.
Indeks: 100129.
Obuna indeksi: 198.
e-mail:
info@tongyulduzi.uz
www.tongyulduzi.uz

«O'zbekiston»
NMIUda chop etildi.
Tahririyatga kelgan barcha
qo'lyozmalar tahrir qilinadi,
mualliflarga qaytarilmaydi.
Haftaning dushanba kuni
chiqadi.
Shakli A-3, 2 bosma taqoq.
ISSN 2010-6092
Adadi – 44000
Buyurtma – S 1822

Muassislar:

O'zbekiston Matbuot va axborot agentligi.
O'zbekiston Respublikasi Xalq ta'limi vazirligi,
«KAMOLOT» yoshlar ijtimoiy harakati
Markaziy Kengashi,
«SOG'LOM AVLOD UCHUN» hukumatga
qarashli bo'lgan xalqaro xayriya fondi.

Gazeta O'zbekiston Matbuot
va axborot agentligida
0208-raqam bilan 2007-yil
2-fevralda ro'yxatdan o'tgan.

TAHRIR HAY'ATI:
Omonulla YUNUSOV,
Abdug'ani XOLBEKOV,
Bahodir G'ANIYEV,
Svetlana INOMOVA,
Murtazo SULTONOV,
Zoir ISAIONOV,
Sobitxon TURG'UNOV,
Zikrilla TESHABOYEV,
Feruza JALILOVA,
Sa'dullo TURSINOV
(Bosh muharrir o'rinbosari),
Feruz MATYOQUBOV
(mas'ul kotib)

Tel./faks: 244-63-08
Tel./faks:
(99871) 244-38-10